

滿清十三
朝之秘史

清譚

上海廣益書局發行

君宜署簽

淵清十三朝之秘史

清

譚

君宜署首

清談序

談以清名。談遜清之往事也。昔者晉人重清談。若以爲談之爲清者。爲山水風月之所獨居。而非他物之所得雜也。而清之爲談者。又高人雅士之所獨有。而非他人之所能知也。然而以清談名書。其取此意乎。抑否乎。曰唯唯否否。是書之性質。本以供文人雅士茶餘酒後之消遣。卽謂之爲取意于此焉。可也。然此書之所以名清者。遜清也。所以名談者。談遜清之掌故也。故雖謂之此之清談。非彼之清談焉。可也。書中所載事實。旣信而可徵。文筆復馴而亦雅。雖謂此之清談。勝于彼之清談焉。亦無不可也。然則此清談也。不亦可貴乎哉。中華民國復活之後五日。編者識。

清談總目

卷一

宮闈談

卷二

政治談

卷三

軍事談

卷四

外交談

卷五

權貴談

卷六

風俗談

卷七

文學談

卷八

藝術談

卷九

災異談

卷十

雜事談

清談卷之一

宮闈談

圓明園

僞皇孫案

盛京行宮舊物

蘇州街

成得行刺案

乾隆朝萬壽慶典之盛

宣宗沖齡神武

德宗聖德恭紀二則

純廟賞鑒

庚子兩宮蒙塵軼聞

清內庭戲劇

內湖珠光

康熙不喜吸烟

却貢玉

曆書異聞

內務府糜費

王太倉上書事

朱檢討上書事

西苑門習射

李蓮英女弟之指婚

某氏女

自鳴葫蘆

一一

一二

一三

一四

一五

一六

一七

一八

一九

二〇

二一

二二

慈禧與德宗母子失和之原因

光緒帝大婚粧奩單

一七

一七

清談卷之一

宮闈談

安吳胡懷琛編次

休寧汪翰校閱

圓明園

長沙徐樹均王壬甫圓明園詞序云。圓明園在京城西。出平則門三十里。暢春園北里許。世宗帝藩邸賜園也。聖祖常遊豫西郊。次於丹棱泚。樂其川原。因明武清侯李偉清華園舊址。築暢春園。藩邸賜園。故在其旁。雍正三年。乃大宮殿朝署之規。以避暑聽政。前臨西山。環以西湖。湖水發源玉泉山。曰鑾山。度宮牆東。流入清河。水經注所謂薊縣西湖。淥水澄澹。燕之舊池者也。東流爲洗馬溝。東南合高粱之水。故魚稻饒衍。陂泉交綺。高宗皇帝嗣位。海宇殷闐。八方無事。每歲締構。專飾園居。大駕南巡。流覽湖山風景之勝。圖畫以歸。若海甯安瀾園。江甯瞻園。錢塘小有天園。吳縣師子林。皆仿其制。增置園中。列景四十。以曰字。

題扁者爲一勝區。區之內齋館無數。復東拓長春。西闢清漪。離宮別館。月榭風亭。屬之西山。所費不計億萬。園地多明季權璫別業。或傳崇禎末。諸奄皆以珍寶窟宅於茲。乾隆間。濬池發金銀數百萬。時國運方興。地不愛寶。上心悅豫。殫精構造。曲盡游觀之妙。元明以來。未之聞也。每歲夏幸園中。冬初還宮。內廷大臣。賜第相望。文武大臣。並從直園林。入直奏對。昕夕往來。絡繹道路。歷雍乾嘉道百餘年於茲矣。文宗初。粵寇踞金陵。盜賊蠭起。上初卽位。求直言。得勝保曾國藩袁甲三三臣。旣以塞程徐陸。先朝重望。相繼傾覆。始擢用前言事者各畀重任。三臣支柱。賊不犯畿。然迭勝迭敗。東南數省。蹂躪無完土。上憫蒼生之顛沛。慨左右之無人。九年冬。郊宿於齋宮。夜分痛哭。侍臣悽惻。大考翰詹。以宣室前席發題。憂心焦思。傷於禍亂。然後稍自抑解。寄於文酒。以宮中行止有節。尤喜園居。冬至入宮。初正卽出。時園中傳有四春之寵。皆漢女分居亭館。所謂杏花春。武陵春。牡丹春。海棠春是也。然上明於料兵。委權梱外。超次用人。海內稱。

哲而部院諸臣。無所磨厲。頗襲舊敝。晚後肅慎敢言自任。故委以謀議。先是道光二十年。英吉黎船至廣東香港求通商不得。又以燒烟起釁。執政議和。予海關稅銀千八百萬。英人請立約。廣督耆英與期十年。屆期而徐廣縉督兩廣。英使至廣州。拒不許入以受封。英帥恨焉。志入廣州。咸豐元年。英吉黎佛郎西米利堅各國。乘粵寇鴟張。中國多故。復以輪舶直入大沽。台王僧格林沁。託團練之名。焚其二船。盡擊走之。外人知大皇帝無意於戰。特臣民之私憤。乃潛至海岸。買馬數千。募羣盜爲軍。半年而成。再犯天津。稱西洋馬隊。聞者恐栗。西人馬步登岸。我未陳而數騎長驅矣。十年六月十六日。上方園居。聞西騎至通州。倉卒率后嬪至熱河。道路初無供帳。途出密雲。御食豆乳麥粥而已。十七日。英帥叩東便門。或有閉城者。聞礮而開。王公請和。和議將定。十九日。西人至圓明園。宮門管園大臣文豐。當門說止之。西兵已去。文都統知奸民當起。環問守衛禁兵。一無在者。索馬還內。投福海死。奸人乘時縱火。入宮劫掠。西人從之。各國皆

火起。三晝夜不熄。非獨我無官守詰問。西帥亦不能知也。初英使臣巴夏里已拘刑部。和議成。以禮釋囚。於是巴夏里與英帥各陳兵仗。至禮部訂約五十七條。予以海關稅銀三千六百萬。而西人抵償圓明園銀二十萬。王公奏言。未敢斥夷。文豐與主事惠豐同死於園。不稱殉節。但言遭兵燹而已。十一年七月。文宗晏駕熱河。今上卽位。奉兩宮皇太后還京。垂簾十載。巨寇削平。而西人通商江海。往來貿易。設通商王大臣以接外使。常言某省士民燬天主教堂。某省不行其教。某省民教構釁。日以難我。應之不暇。蓋岌岌乎中外雜處。又忽忽十有一年。園居荒虛。鞠爲茂草。西山大寺。西婦深居。余旅京師。惻然不敢過也。同治十年春。同年王壬甫重至輦下。追話舊游。適張子雨珊亦以計偕來。約訪故宮。因駐守參將廖承恩許爲東道主。四月十日。命僕馬同過繡漪橋。尋清漪園遺跡。頽垣舊瓦。零亂榛蕪。宮樹蒼蒼。水鳴鳴咽。由輦路登廓如亭。南望萬壽山。但見牧童樵子。往來林莽間。暮從昆明湖歸。橋上銅犀臥荊棘中。犀背御銘。朗然

可誦。明日訪守園者。得董監。自言歲七十餘。自道光初入侍園中。今秩五品。居福園門旁。導予等從瓦礫中循出。入賢良門而北。指勤政光明壽山太和四殿遺址。至前湖。圓明寢殿五楹。後爲奉三無私殿。九州清晏殿。各七楹。壞壁猶立。拾級可尋。董監言東爲天地一家春。后居也。西爲樂安和。諸妃嬪貴人居也。洞天深處。皇子居也。清輝殿。爲文宗重建。與五福堂。鏤月開雲臺。朗吟閣。皆不可復識。鏤月開雲者。卽所謂牡丹春也。世宗爲皇子。當花時。迎聖祖至賜園。而高宗歲十二。以皇孫召侍左右。三天子福壽冠前古。集於一堂。高宗後製詩常誇樂之。經其廢基。徘徊怒焉。東渡湖爲蘇堤。長春仙館。藻園。又北爲月地雲居。舍衛城。日天琳宇。水木明瑟。濂溪樂處。僅約略指視所在。東北至香雪廊。階前葦荻蕭蕭。廢池可辨。有老監奉茶自池畔出。訝客所從來。頗似桃源人逢漁郎也。渡橋循福海西行。爲平湖秋月。水光溶溶。一瀉千頃。望蓬島瑤臺。島上殿宇猶存數楹。惜無方舟。不達其下。流水潺湲。激石成響。董監示予。此管園大臣文公

死所也。西北至雙鶴齋。又西過規月橋。登綺吟堂。經采芝徑。折而東。仍出雙鶴齋。園中殘燬幾遍。獨存此爲劫灰之餘。亂草侵階。窗櫺宛在。尤動人禾黍悲爾。雙鶴齋西爲溪月松風。翠柏蒼藤。沿流覆道。斜日在林。有老宮人驅羊豕下來。東過碧桐書院。地跨池。東爲金鰲。西爲玉竦。坊楔猶存。又東去皆敗壞難尋。遂不復往。暮色沈沈。棲鴉亂飛。揖董監出福園門。還於廖宅。廖澧州人。字楓亭。少從塞尙阿僧格林沁軍。亦能言行間事。感予來遊。頗盡賓主之歡。既夕言歸。則禮部放榜日也。雨珊旣落第南去。予與壬父每相過從。言念園游。輒惘惘不自得。壬父又已園盛時。純皇勒記。必殷殷踵事之戒。然仁宗始罷南幸。宣宗尤憂國貧。秋獮之禮。輟而不舉。惟夫張弛之道。宜及嘉道時。補純皇倦勤之功。而內外大臣。惟務慎節。監司寬厚。牧令昏庸。諱盜容奸。以爲安靜。八卦妖徒。連兵十載。無生天主教。目滋繁。由游民輕法。刑廢不用故也。江淮行宮。旣皆斥賣。國之所患。豈在乏財。又曰燕地經安史戎馬之迹。爰及遼金。近沙漠之風矣。明太宗

以燕王舊居不勝改宅。仍而至今。地利竭矣。又園居單外。非所以駐萬乘。廢而不居。蓋亦時宜。余曰然。前年御史德泰。請按戶畝。鱗次捐輸。復修園宮。大臣以侈端將啟。請旨切責。謫戍未行。忿悔自死。自此莫敢言園居者。而比年備辦大婚。費已千萬。結彩宮門至十餘萬。公奏朝廷。動用錢糧。婚以成禮。豈在華飾。若前明戶部司官。得以諫爭。予且達言矣。又余聞慈安太后在文宗時。有脫簪之諫。關雎車牽之賢。中興之由也。又園宮未焚前一歲。妖言傳上坐寢殿。見白頭老翁。自稱園神。請辭而去。上夢中加神二品階。明日至祠諭祀之。未一稔而園毀。豈前定歟。子能詩者。達於政事。曷以風人之意。備繁霜雲漢之采。於是壬父爲圓明園詞一篇。而周學士潘侍郎見之。並歎其傷心感人。筆墨通於情性。余以此詩可傳後來。慮夫代遠年逝。傳聞失實。詞中所述。罔有徵。乃爲文以序之。○附王壬甫圓明園詞云。宜春苑中螢火飛。建章長樂柳十圍。離宮從來奉游豫。皇居那復在郊圻。舊池澄綠流燕薊。洗馬高梁游牧地。北藩本鎮故元都。西

山自擁興王氣。九衢塵起暗連天。辰極星移北斗邊。溝洫填淤成斥鹵。宮廷映帶隰泉原。淳泓稍見丹棱汧。陂陀先起暢春園。暢春風光秀南苑。蜺旌鳳蓋長游宴。地靈不惜鑿山湖。天題更創圓明殿。圓明始賜在潛龍。因何邸第作郊宮。十八籬門隨曲澗。七楹正殿倚喬松。軒堂四十皆依水。山石參差盡亞風。甘泉避暑因留蹕。長楊扈從且弢弓。純皇繼業當全盛。江海無波待游幸。行所留連賞四圖。畫師寫放開雙境。誰道江南風景佳。移天縮地在君懷。當時只擬成靈囿。小費何曾數露臺。殷勤毋佚箴驕念。豈意元皇失恭儉。秋獮俄聞罷木蘭。妖氛暗已傳離坎。吏詔凌遲民困痛。長鯨跋浪海波枯。始驚計吏憂財賦。欲賣行宮助轉輸。沈吟五十年前事。厝火薪邊然已至。揭竿聲欲犯阿房。探丸早見誅文吏。此時先帝見憂危。詔選三臣出視師。宣室無人侍前席。郊壇有恨哭遺黎。年年輦路看春草。處處傷心對花鳥。玉女投壺強笑歌。金杯擲酒連昏曉。四時景物愛郊居。玄冬入內望春初。嫋嫋四春隨鳳輦。沈沈五夜遞銅魚。內裝頗學

崔家髻。諷諫頻除姜后珥。玉路旋悲車轂鳴。金鑾莫問殘燈事。鼎湖弓劍恨空還。郊壘風煙一炬間。玉泉悲咽昆明塞。惟有銅犀守荊棘。青芝岫裏狐夜啼。繡漪橋下魚空泣。何人老監福園門。曾綴朝班奉至尊。昔日喧闐厭朝貴。於今寂寞喜遊人。遊人朝貴殊喧寂。偶來無復金閨客。賢良門閉有殘磚。光明殿燬尋頽壁。文宗新構清輝堂。爲近前湖納曉光。妖夢園神辭二品。佛城舍衛散諸方。湖中蒲稗依依長。階前蒿艾蕭蕭響。枯樹重抽盜作薪。遊鱗暫躍驚逢網。別有開雲鏤月臺。太平三聖昔同知。來甯亂竹侵苔出。不見春花泣露開。平湖西去軒亭在。題壁銀鈎連到轡。金梯步步度蓮花。綠窗處處留羸鱉。當時倉卒動鈴馳。守宮上直餘嬪娥。蘆荻短吹隨秋月。豆粥長飢望熱河。上東門開胡難過。正有王公班道左。敵兵未熟雍門萩。牧童已見鷗山火。應憐蓬島一孤臣。欲持高絮比靈均。丞相避兵生取節。徒人拒寇死當門。卽今福海冤如海。誰信神州尙有神。百年成毀何忽促。四海荒殘如在目。丹城紫禁猶可歸。豈聞江燕巢林下。